

Onn was merr nit alles denke muss

Om letzde Freidaach uffem Markt habb ichs Kättche getroffe, die hadd enn schwere Korb voll Gemies unn wollden grad fortschleppe. Doo habb ich zu ihr gesacht: Ei Kättche, musst du dess gonze Zeich hoomtraache?

Ei was will ich dann mache, hottse merr zur Antwort gewwe, de Schorsch wollt nit gehe unn doo musst ichs halt mache.

Ich habb de Kopp geschittelt. Warum geht dann der Olwel nit uff de Markt? Wart enn Aacheblick, wenn ich moi Zeich kaaft habb fahr ich dich hoom, du schleppest dich joo kabutt.

Als mir im Audo gesotze hawwe habb ich nochemol gefroocht: Warum geht dann de Schorsch nit uff de Markt, ess iss doch garnimmi so haaß?

Dess Kättche hott gegrinst. Du moonst, weiler vor fünf Woche noch gesacht hott, er geht nit uff de Markt weeche de Klimakatastrof? Naa, heit unnn aach de nächsde Freidaach gehder nit uff de Markt weechem Bub soine Garasch.

Ich frooch: Weeche eierm Bub soine Garasch gehder nit uff de Markt? Seid ihr schunn om Baue? Grad die letzde Daache hott de Schorsch mir verzählt, ihr hätt noch gar koo Genehmichung, weils garnit so oofach wär, die alt Garasch ze verlängern?

Dess Kättche hott mette Achsele gezuckt. Du kennst doch doin iwwerzwerche Freund. Grad weil merr noch koo Genehmichung hawwe gehder nit uff de Markt.

Ich konnst nit glaawe. Sitzt der dehoom unn wart uff die Post mette Genehmichung? Odder was iss? Dess mussde merr erklärn, Kättche.

Unns Kättche hott merr alles verzählt: Doo warer doch vor de erst Wahl hier uffem Markt unn iss mett zwaa Rose hoomkumme, die oo war gelb, die onner rot. Die hotter merr uff de Kichedisch geleecht, hott geschnauft unn hott geschennt: Wenns e Noochwahl gibt, kriehsde mich die nächsde zwaa Woche nit uff de Markt. Unn als ichen gefroocht habb, ei warum dann nit, doo sachder: Weeche de Rose. Unn weeche dem Bub soiner Garasch. Doo frooch ich: Weeche de Rose unn weeche de Garasch? Was sollen dess schunn widder. Monchmal glaab ich, du bist oofach zu faul ferr uff de Markt ze gieh.

So isses nit, Kättche, hotter gerufe, um Gotteswille, naa. Awwer gucke mol, wenn ich die nächst Woch hiegeh unn nimm e rot Ros von de SPD, dann mache die von de CDU schette Aache weilse moone, ich det de Rote wähle. Nimm ich oo von de CDU, doo gucke die von de SPD komisch, weil jetzt die moone ich det die Schwarz wähle. Nimm ich von dene zwaa koo Ros, isses genauso als det ich wie heit von jedem oo nemme. Hier wie doo moone die dann, ich kennt mich nit ferr die oo odder ferr de onnern entscheide unn kriehn aach Zorn. Also geh ich zwaa Woche nit uff de Markt, doo gibts aach koo Probleme.

Weil ichs noch nit kapiert hadd habb ich dann gefroocht: Schorsch, emol longsom. Dess warn die Rose. Awwer was hawwen die dann mettem Bub soiner Garasch ze due?

Ei Kättche, hott moin Monn gerufe, ich bin halt ooner der onn alles denkt. Weil wenn dann jemond, egal von welcher Pardei, Beiemooster werdd unn die sich droo erinnern, dass ich koo Ros von dene genumme habb, odder von jedem oo odder von jedem koo unn die dann moone, ich hädd mich nit ferr sie entscheide könne, dann dunse dem Bub die Garasch nit genehmische. Denke muss merr, Kättche, denke!

Eiern Honnes